

Bilten srednjoškolaca MSEUŠ Travnik

Učenice generacije

2024/2025



POSJETA MEMORIJALNOM CENTRU POTOČARI – SREBRENICA

Učenici srednjih škola s područja općine Travnik, među kojima i učenici Mješovite srednje ekonomsko-ugostiteljske škole Travnik, posjetili su Memorijalni centar Potočari u Srebrenici.

Maturalna večer

2024/2025



SCI & TECH CHALLENGE 2025

Učešće naših učenica na SCI & TECH CHALLENGE 2025, koji je održan na Fakultetu inženjerstva i prirodnih nauka Univerziteta u Zenici.



Učenice generacije

2024/2025



Seldina Kukić IV-1
Ekonomski tehničar

Razdoblje u MSEUŠ Travnik, predstavljalo je izuzetno pozitivno i formativno iskustvo koje je uveliko oblikovalo moje interese i buduće ciljeve. Od samog početka, osjetila sam iznimnu podršku profesora i cjelokupnog osoblja škole. Njihova predanost i nastojanje da mi omoguće sve što je potrebno za uspješno obrazovanje bili su konstantno prisutni. Bilo da se radilo o dodatnim pojašnjenjima tokom nastave, individualnom pristupu ili razumijevanju za moje potrebe, uvijek sam osjećala da imam njihovu punu podršku. Kroz ekonomsku grupu predmeta, otkrila sam područje koje me uistinu zanima i u kojem sam se pronašla. Nastava iz ekonomije bila je izuzetno kvalitetna, a profesori su uspjeli prenijeti svoje znanje na zanimljiv i pristupačan način. Zahvaljujući stečenim znanjima i vještinama, kao i podršci koju sam neprestano dobivala, sada sam sigurna u svoju odluku da nastavim svoje obrazovanje u sferi ekonomije. MSEUŠT nije bila samo mjesto sticanja znanja, već i okruženje u kojem sam rasla kao osoba, razvijala svoje interese i dobila vjetar u leđa za budućnost.

Izbor ekonomske škole bio je jedna od najboljih odluka u mom životu. Iako je bilo trenutaka kad sam se pitala da li sam donijela pravu odluku, sada, na kraju školovanja, potpuno sam sigurna da nisam pogriješila.

Školsko iskustvo mi je omogućilo da steknem širok spektar znanja koja će mi biti korisna u budućnosti. Sigurna sam da će mi znanje koje sam stekla u ekonomskoj školi otvoriti mnoga vrata u budućnosti.

Želim da se zahvalim profesorima koji su nesebično prenosili svoje znanje, bili strpljivi i spremni da pomognu.



Adna Hrustanović IV-1
Ekonomski tehničar

Nakon završetka osnovne škole, dvoumila sam se između svijeta ekonomije i svijeta informatike. Upravo zato odlučila sam upisati poslovno-informatički smjer u ekonomskoj struci ove škole, želeći sebi pružiti priliku da kroz srednjoškolsko obrazovanje otkrijem kojem području više pripadam.

Danas, kao maturantkinja ovog smjera, mogu sa sigurnošću reći da me moji interesi i afiniteti sve više vode ka informatici i tehnologiji.

Trenutno se nalazim na raskrsnici između Elektrotehničkog fakulteta i studija Softverskog inženjeringa. Iako još uvijek donosim konačnu odluku, sigurna sam da ću uskoro izabrati pravi smjer – onaj koji će mi omogućiti dalji rast, kako na ličnom, tako i na profesionalnom planu.



Dalila Kajmak IV-2
Poslovno-informatički tehničar



Neila Filan IV-2
Poslovno-informatički tehničar

Učenica sam četvrtog razreda srednje škole, smjer poslovno-informatički tehničar. Sada, na kraju svog srednjoškolskog obrazovanja, mogu reći da sam zadovoljna svojim izborom. Tokom školovanja u MSEUŠ-u stekla sam mnoga korisna znanja i iskustva, koja su mi pomogla da se razvijam i kao učenica i kao osoba. Škola mi je pružila prilike da napredujem i učim na različite načine. Planiram studirati Ekonomski fakultet.

Zahvaljujem se svim profesorima koji su bili dio mog puta i velika podrška kroz ove četiri godine."





Završetkom školovanja na hotelsko-turističkom smjeru osjećam veliku zahvalnost što sam stekla znanja i vještine koje će mi koristiti u daljnjem životu. Škola mi je pružila priliku da razvijem stručnost u turizmu, ali i osobine poput odgovornosti, komunikativnosti i snalažljivosti.

Praktična iskustva i rad s ljudima naučili su me važnosti timskog rada i gostoprimstva. Ponosna sam što iz škole izlazim bogatija za mnoge vještine i iskustva koja će mi biti temelj za dalje. Planiram nastaviti širiti svoje znanje i razvijati se u području turizma. Vjerujem da će mi sve što sam stekla tokom školovanja pomoći da s lakoćom i sigurnošću koračam u nove izazove i ostvarim svoje ciljeve u budućnosti.

Sumeja Smajlović IV-3
Hotelsko - turistički tehničar





Maturalna večer

2024/2025



68. generacija maturanata završnih razreda Mješovite srednje ekonomsko – ugostiteljske škole Travnik 2024/25.. Noći puna emocija, ponosa, zabave i lijepih sjećanja.



11. maja 2025. godine, maturanti su, obučeni u elegantna odijela i raskošne haljine, ponosno koračali kroz centar grada. Veliki broj građana, roditelja, prijatelja i sugrađana okupio se kako bi pozdravio i ispratio mlade ljude koji ovim činom simbolično zatvaraju jedno životno poglavlje i hrabro zakoračuju u novo.





Ekonomski tehničar IV-1



**Poslovno - informatički
tehničar IV-2**



**Ugostiteljsko - turistički
tehničar IV-3**



Kuhari III-5





Posjeta Potočarima - SREBRENICA



Učenici srednjih škola s područja općine Travnik, među kojima i učenici Mješovite srednje ekonomsko-ugostiteljske škole Travnik, posjetili su Memorijalni centar Potočari u Srebrenici.

Ova značajna posjeta realizirana sada već tradicionalno uz pomoć @Udruženja prijatelji Travnika za Srebrenicu, Bošnjačka zajednica kulture Travnik, a sve uz pokroviteljstvo premijera Vlade SBK, @Ministarstva obrazovanja, nauke, mladih, kulture i sporta SBK/SBK i načelnika općine Travnik.

Posjeta je imala za cilj da mladim generacijama približi istinu o tragičnim događajima iz jula 1995. godine, te da se na dostojanstven način oda počast nevinim žrtvama genocida u Srebrenici.

Kroz obilazak Memorijalnog centra i susret sa svjedočanstvima preživjelih, učenici su imali priliku da se suoče s važnošću kulture sjećanja, poštovanja ljudskih prava i izgradnje trajnog mira.



Zahvaljujemo se svima koji su podržali ovu plemenitu i edukativnu posjetu.



Sjećanje na žrtve Srebrenice ne smije i neće biti zaboravljena!!



SCI & TECH CHALLENGE 2025

Učenice hemijske sekcije Ajna Bešo, Fuško Azra i Zuparević Ismira učestvovala su na SCI & TECH CHALLENGE 2025, koji je održan na Fakultetu inženjerstva i prirodnih nauka Univerziteta u Zenici. Na ovom naučno-tehničkom takmičenju učenice su predstavile svoj projekat pod nazivom „Dokazivanje prisutnosti vitamina C u uzorcima hrane“, u kojem su kroz eksperimentalni rad pokazale kako se jednostavnim hemijskim metodama može utvrditi količina vitamina C u različitim prehrambenim proizvodima.

Njihovo učešće predstavlja značajan doprinos promociji nauke među mladima, a svojim radom i prezentacijom dostojno su predstavile svoju školu i hemijsku sekciju.



"Glamur"

Poslovna ideja "Glamur" proglašena najboljom idejom na takmičenju srednjoškolaca „Tvoja ideja - tvoja budućnost". Prvo mjesto su osvojile učenice III1 Ajna Sarajčić, Ajla Rebihić i Semra Ribu pod mentorstvom profesorice Aide Ramčić-Salkić. U cilju podizanja poduzetničkog duha kod mladih, takmičenje je organizovano prvi put u gradu Novom Travniku od strane Kluba za podršku žena poduzetnica i Fakulteta poslovne ekonomije Sveučilišta/Univerziteta "Vitez".



Na javno objavljen poziv se odazvalo više ekipa i pojedinaca, te je nakon pregleda svih pristiglih prijava od strane stručnog žirija, u školu stigla obavijest da su ideje "Glamur" i "Digitalni svijet" odabrane među pet najboljih te će biti predstavljene na završnoj prezentaciji trećeg juna 2025. godine u zgradi Gradske uprave Novi Travnik, što je danas i realizirano. Događaj je organizovan u okviru manifestacije Dani grada Novog Travnika, te je svojim prisustvom podršku pokazao i gradonačelnik Stjepan Dujo. Srednjoškolci su pokazali veliku kreativnost prezentacijama, tako da žiriju nije bio ni malo lagan posao jer su sve ideje bile kvalitetne. Tim više smo ponosni na naše učenice i njihove mentorice. Ekipu "Digitalni svijet" su činile učenice III2 Sara Ahmić, Hađija Đogić i Arnela Karić sa mentoricom profesoricom Hasibom Horić.

Nastup ekipe "Glamur" je bio toliko autentičan da su zasluženno osvojile prvo mjesto i nagradu od 500 KM. Drugoplasirana je ideja "Padel" Marka Barnjaka (300 KM), dok je trećeplasirana Anja Vrebac s projektom "Aplikacija za dopunsku nastavu" (200 KM), oboje učenici novotravničkih srednjih škola. Organizatori su odlučili nagraditi simbolički i ostale učesnike, te se niko nije vratio kući praznih ruku. Pored nesumnjivo vrijednih nagrada, ono najvrijednije što su svi ponijeli u uspomenama je divna atmosfera, dobra organizacija i spoznaja da se trud i učenje isplate. U to ime, hvala organizatorima, a našim "zlatnim djevojkama" još jednom čestitke što svojim uspjesima pokazuju da vrijedi biti đak Mješovite srednje ekonomsko-ugostiteljske škole Travnik gdje među učenicima živi slogan ovogodišnjeg sajma PZV "Za ekonomiju se borimo, jer ekonomiju volimo".

PROJEKTI

Naša škola je bila aplikant na projektu "Prikupljanje i odabir korisnika malih grantova sredstava u 2025. godini za unapređenje i razvoj turizma na općini Travnik", povodom obilježavanja Svjetskog dana turizma. Na naše veliko zadovoljstvo danas smo uspješno potpisali ugovor o realizaciji istog.

Na projektu rade učenici II-2 razreda, a vođe projekta su učenice Dalila Mehić, Ena Ćosović i Lamija Salkica. One su dokaz da se rad i upornost uvijek isplati.

Povodom Svjetskog dana turizma, realizujemo promotivni projekat s ciljem isticanja Travnika kao jedne od najautentičnijih i najbogatijih turističkih destinacija u Bosni i Hercegovini. Kroz niz kulturnih, edukativnih i promotivnih aktivnosti želimo podići svijest o turističkom potencijalu Travnika, njegovoj historijskoj važnosti, prirodnim ljepotama, gastronomiji i gostoprimstvu.



Svečana dodjela diploma

Danas su našim dragim maturantima, generaciji 2024/2025.godine, uručena svjedočanstva i diplome o okončanom srednjoškolskom obrazovanju i zasluženom stečenom zvanju ili zanimanju.



Svim učenicima i njihovim roditeljima upućujemo iskrene čestitike na uspješnom završetku srednje škole i želimo im puno sreće u budućem školovanju ili radu.



TRAVNIK

Heart OF BOSNIA AND HERZEGOVINA